

# Acht kinder in de priesen en 25 verhoalen in n boukje Schriefwedstried mit veul verbasterd Grunnegers

■ KNOAL – „Wie stellen joe veur ain jaarliek wedstried uut te schrieven, woarbie de winnoars in de (dialect-)moand meert bekend makt worden”. Over veur en tegen van punt 1A van de roadsvergoadern huif nait proat worden. Hoamerklop. Kloar. Zo t staait, wordt besloten. Doar kinnen as t mout ook Knoalsters kört in wezen.

Door **Johan Poppen**

Gain wonder. Schriefwedstried veur de jeugd is aansloagen: meer as honderd inzendens, videntwinteg der van goud genög veur in t boukje 'Der was ais...' en doar weer acht van n pries weerd mit drij eervolle vermeldens. Ze binnen oetlangd in roadzoal deur börgmeester Brink zulm. Dat zel hom as veurzitter van stichting Grunneger Toal dubbel deugd doan hebben.

Toch haar jury van zeuven Knoalsters over t aigen toaltje van de kinder wat te zeggen. Veul verbasterd Grunnegers en benoam de spellen hebben heur te denken geven: „Wat zol t fijn wezen as doar op school wat aan doan worden kon”. Doarom goan 300 van dizze boukjes ook tot deure oet. Din kinnen nog meer meesters, jufs en leroaren op basisschoulen en in t onderwies, wat doar noa komt, heur jonkvolk aanpittjen ook te schrieven en te proaten in ons streektoal.

Op dörpen gaat dat kinder nog nait zo stoer öf. Dat kin je zain aan woar maiste prieswinnoars vandoan komen: Muzzel, Onstwedde, t Alteveer. n Wichtje oet t Knoal haar meer muite mit proaten din mit schrieven. Mit olleren is t maistieds ansom en doarom is t goud, dat ook dat wichtje



Foto: Hans Banus

deurzet het. Heur pa zee mor aal laggend op zien Hollands: „Ik vind het prachtig!” Kiek, zokse ollers mout we hebben!

**Aigen stökjes waark**  
Pennedeuzen, bouken en boukebonnen binnen

te laande komen bie (eerste priesen): Janneke Drenth (12) oet Onstwedde; Arjan Blaauw (16) en Wim Jager (20), ainegste in de oldste ploeg, baaident oet t Knoal. Twijde priesen: Jarno Duursma (10) ook oet t Knoal en Aike Wolfs (16) oet Onstwedde. Daarde priesen: Elisabeth Mei-

◀ **Wim Jager, Jeroen Wever, Elisabeth Meibos, Bertha Wubs, Aike Wolfs, Arjan Blaauw, Jarno Duursma en Janneke Drenth** vuilen in de priesen: ...ook mit schrieven mout je hailental onderaan begunnen...

bos (12) oet t Knoal, Brenda Wubs (12) oet Alteveer en Jan Wever (11) oet Muzzel. Eervolle vermeldens: Gerdien de Groot (11) oet Onstwedde, Jeroen Wever (9) oet Muzzel en Lisette Zuidema (12) oet t Knoal.

Van dizze verhoaltjes van kinder in heur 'aigen' taal hebben tiepkoamer en hoedrokkerij van t gemaintehoes ook n aigen stökje waark moakt, mit taikentjes van Frans Meerhoff der bie. Leuf mor, dat ze der oareghaid aan had hebben. Weer ais hail wat aans as aal dat dreuge tikwaark over herinrichtens en zokswat meer.

Lees mor ais hou smui Jan Wever over t moeras van Muzzel schrift. Doar zel wel nooit n ooievoar in t nije nust komen, maint e. En toch binnen doar bie Nonkes in t hok jonge knienen geboren. Hou dat din wel kin? Din mout je t 'eerliekse' verhoal van Jan zien bruijtje Jeroen mor ais goud lezen.

Hai is de jongste van wat de jury in heur rapport 'jonge Grunneger scribanten' nuimt. Gebroeken ze bie oetzunderen ais n stoer Hollands woord oet t latien en is dat vot verkeerd tikt. En loat het goie woord 'scribenten' din ook nog 'prulschrijvers' betaikenen... Niks van aantrekken, kinder. Deurzetten, ook al liekt t joe ook nog zo verbasterd Grunnegers!